



Kebudayaan Kebangsaan Teras Identiti

Assalamualaikum Warahmatullahi Wabarakatuh dan salam sejahtera.
Bismillahir Rahmanir Rahim.

Beta bersyukur ke hadrat Allah s.w.t. kerana dengan limpah rahmat-Nya dapat Beta hadir di Majlis Perasmian Muzium Diraja Perak ini. Sukacita Beta mengucapkan tahniah kepada Jawatankuasa Muzium Diraja Perak yang telah dapat mengatur dan mewujudkan sebuah muzium diraja. Segala penat lelah mereka yang terlibat amat dihargai dan semoga Allah s.w.t. akan memberkati segala usaha yang murni ini.

Mengikut fakta sejarah, institusi kesultanan telahpun wujud di negara ini sejak berzaman-zaman dahulu. Ia merupakan asas sistem pemerintahan negara yang ada pada hari ini. Pemerintahan beraja dikekalkan bagi menyatupadukan kaum yang berlainan budayanya.

Titah Ucapan sempena Upacara Pembukaan Rasmi Muzium Diraja Perak, Kuala Kangsar, 16hb. November 1986.



Sistem beraja ini menjadi simbolis kewujudan suatu identiti Malaysia berteraskan kebudayaan kebangsaan dan perpaduan negara. Peranan institusi kesultanan dalam melahirkan sebuah negara yang stabil, aman dan makmur yang ada pada hari ini tidak boleh diperkecilkan. Berdasarkan perkara tersebut adalah tidak wajar bagi mana-mana pihak menimbulkan soal kesultanan dalam apa bentuk sekalipun.

“... dapat memahami tanggungjawab dan peranan yang dimainkan oleh Kesultanan Perak dalam aspek pembangunan Islam, politik, ekonomi dan sosial.”

Dengan adanya muzium diraja, Beta berharap generasi sekarang dan yang akan datang dapat mempelajari serta menghayati khazanahinggalan sejarah serta memahami sistem pemerintahan beraja yang wujud di Negeri Perak Darul Ridzuan. Mereka juga dapat memahami tanggungjawab dan peranan yang dimainkan oleh Kesultanan Perak dalam aspek pembangunan Islam, politik, ekonomi dan sosial. Oleh itu, Beta menyeru rakyat jelata daripada semua peringkat agar datang menambahkan pengetahuan dalam aspek pemerintahan beraja ini.

Muzium Diraja Perak ini juga dapat mencerminkan keindahan identiti kebudayaan masyarakat Melayu Perak melalui seni binanya yang menarik dan diharapkan agar motif seni bina ini dapat diperluaskan lagi dan dihidupkan dalam pembinaan bangunan-bangunan kerajaan mahupun swasta di negeri Perak pada masa akan datang. Oleh hal yang demikian, para pelancong yang mengunjungi negeri Perak dapat merasakan keseragaman dalam kesenian binaan di negeri Perak.

Di samping itu, Beta ingin menyeru kepada pihak yang dipertanggungjawabkan kepada muzium ini, khususnya kerajaan negeri Perak supaya mempertingkatkan lagi usaha bagi memajukan muzium ini dan diberikan publisiti yang meluas agar masyarakat Malaysia dapat mengetahui tentang wujudnya muzium ini, sekali gus akan mempopularkan Bandar Diraja Kuala Kangsar kepada masyarakat



umum dan dunia.

Dengan pandangan dan harapan ini, Beta Dengan Nama Allah Yang Maha Pemurah Lagi Maha Mengasihani, mengisytiharkan Muzium Diraja Perak dibuka dengan rasminya.

Wabillahitaufik Walhidayah Wassalamualaikum Warahmatullahi Wabarakatuh.

